

«Egn'ureta agl mund digl Tumasch Dolf»

Tumasch Dolf – par blears an la Val Schons egn num ancunaschaint. Egn cumponist, raquintader a surmester c'è s'angascho par salvar igl idiom sutsilvan. Par la savunda dumeingia d'advent à la fundaziùn «Tgea da tgeant» preparo egna sera cun canzùns a texts da Tumasch Dolf an la baselgia a Maton.

STEFANIE ELSA/FMR

Dumeingia sera an la baselgia da Maton – igl liac da naschientscha digl Tumasch Dolf (1889–1963) – àn ign do anur agl cumponist a raquintader. Cun egn peer istorgias a canzùns da Tumasch Dolf dat igl «egn'ureta agl mund digl Tumasch Dolf», gi la *Telgia Juon* durant igl bagnvagnieu agl publicum. Anturn trainta parsùnas àn cato la veia se Maton.

Egn digls grànds raquintaders

Igl teolog *Niklaus Peter* à mano tras la sera cun raquents digl Tumasch Dolf, translatos an tu-destg. La part rumàntscha à la *Simona Beeli* fatg. Igl publicum à gest santieu l'amur par igl Tumasch Dolf – igl Niklaus Peter à ear scho saver igls auditurs a las audituras co el e vagnieu segls fastezs digl cumponist, raquintader a surmester oriund da la Val Schons. El vegi cato egna revista da sia mama cun raquents digl Tumasch Dolf. Sco igl Niklaus Peter à getg: «Par me s'oda igl Tumasch Dolf tier igls grànds raquintaders», a gliez à ear igl publicum santieu cun la selecziùn d'istorgias a canzùns.

Durant la la sera àn duas cantaduras a dus cantadurs – igl «Fogal-May Vokalquartett» canto diferaintas canzùns digl Tumasch Dolf. Cun la Simona Beeli ad igl Niklaus Peter à igl publicum ear survagnieu investa agls texts a raquents digl Tumasch Dolf. Las passaschas c'en vagnidas ligidas an sutsilvan da la Simona Beeli àn gest mano ampo anavos agl tains las audituras ad igls auditurs.



Igl «Fogal-May Vokalquartett», Simona Beeli ad igl teolog Niklaus Peter (da saniester). FOTO STEFANIE ELSA

Mia geia

Igl favorit digl Niklaus Peter e igl raquent «Mia geia». Sco buab à igl Tumasch Dolf survagnieu quella digl bab. Mo egna cunsculara veva egna geia nova, ad ear igl pintg Tumasch à parschudieu sieus bab da comprar egn instrumaint nov par el. Sco carschieu vegi el alura ànc egn'ea priu anavànt la geia viglia a pino ella. Par igl bab, la duna ad igls unfànts ve-

gi el suno la geia. Cugl zitat digl raquent «Co igl sa ir gi alla veta digl carstgàn, tocen ign ancuscha quegl ca e propi da valur!», ligieu agl idiom indigen, vean ear puspe andamaint la valur digl sutsilvan – egna tematica c'era schon preschainta agl tains da Tumasch Dolf. La sera an anur digl cumponist, raquintader a surmester mussa, c'igl vargieu a mintgatànt ear ànc valur par igl preschaint.